

APROXIMACIÓN ÁS RELACIÓNS LITERARIAS GALEGO-CATALANAS. NOTICIAS HISTÓRICAS E BIBLIOGRÁFICAS

JUAN M. RIBERA LLOPIS e OLIVIA RODRÍGUEZ GONZÁLEZ

Nun ámbito como o peninsular onde historiográficamente as súas tradicións literarias se amosaron case esforzadas en organizar sospeitosas historias diverxentes, sorprende, se non a regular constancia, si o continuado goteo de estudos que remiten ás relacións e ó contraste de situacións histórico-literarias vividas en galego e en catalán. Cómpre dicilo, prioritariamente desde Galicia. Seica pesase nisto o referente que conxugan Manuel Murguía e Alfredo Brañas. Referímonos á chamada de atención que o primeiro fai ós *rexurdentistas* con respecto á *Renaixença* alá polo 1886 en *Los Precursor*s (1976: pp. 141-142) e á proxección catalana da teorización rexionalista do segundo, con *El regionalismo: estudio sociológico, histórico y literario* publicado en Barcelona no 1889. Abofé que, ó contrario, tamén podería ter actuado como acicate historiográfico a atención que á cultura galega e ó seu novo pulo prestaron homes cataláns como Manuel Milà i Fontanals –non só estudiando a lírica galego-portuguesa, senón facendo algúns que outro aceno de complicidade co comportamento galego á hora de revisa-la rexeneración catalana (1893: p. 435)–, como Víctor Balaguer –colaborador nos Xogos Florais galegos dos anos oitenta e que no seu discurso de recepción na Real Academia Española, titulado *Las literaturas regionales*, fai un encomiástico percorrido das letras galegas dende o trovadorismo ós certames coetáneos (1883: pp. 4-5, 33-35)–, ou como Joan Maragall –abraiado visitante de Galicia no 1903 e forxador do anovamento da súa imaxe en claves modernistas paralelas ás de Valle Inclán–. O certo é que, desa armazón histórica asentada na encrucillada de séculos e alongada no novecentos –unha suxestiva proba da mutua atracción sería o cruzamento entre os poemas galegos de Carles Riba e os poemas cataláns de Álvaro Cunqueiro–, proxéctase unha bibliografía que, con cativas excepcións, se alentou case sempre desde Galicia. Como mostra,

non obstante, da excepcionalidade e como desagravio doutras aportacións que polo de agora se nos escapan, citarémo-lo traballo de Artur Quintana Font, *Presencia e influencia das letras galegas sobre as catalanas de postguerra*, presentado no V Congreso Internacional de Estudios Galegos (1997), e onde o catálogo de nomes máis familiares como os de Salvador Espriu e Joan Peruchó que certifican a atención dos escritores en catalán pola tradición literaria galega amplíase con datos más excepcionais como é o da incursión poética galega de Josep Pedrell.

Combinando a partir de agora historia e entrada bibliográfica, faremos un apertado percorrido polo achado cultural galego-catalán. É, no principio da nosa ordenación, Alfonso Magariños en *Los gallegos* (1979) quen formula o perfil dunha «relación dialéctica de influencia mutua» animada polo encontro de guieiros das culturas galega e catalana. Magariños indícanos o adiantamento de Joan Mañé i Flaquer e de Valentí Almirall sobre Brañas, así como a anticipación do mesmo Brañas ás *Bases de Manresa* (1892) ou a súa incidencia sobre Enric Prat de la Riba, e lémbranos finalmente a coincidencia de intereses anticentralistas entre *Solidaridad Gallega* e a *Lliga* (1979: pp. 39-40,43). Trátase xa que logo, no caso do eixo galego-catalán, dunhas relacións que comezan con crecente constancia na segunda metade do século XIX para se adentrar no novecentos. Relacións inscritas na cerna dunha dinámica que vai do rexionalismo ó iberismo e que, na súa orixe, algó haberá de deber ó desprazamento de poboación e intereses cataláns cara a Galicia a mediados do século XVIII. Así, en calquera caso, ábrese un arco cronolóxico no que a recepción catalana vai modificando a súa percepción do galego, superando cotas impostas polo estereotipo costumista, e no que os intelectuais galegos miran en non poucas ocasións os pasos da rexeneración catalana como fitos exemplares. O vieiro deste achegamento galego-catalán dende o

punto de vista literario ten unha condensada revisión no *Limiari de Xosé Filgueira Valverde a Gallegos en Cataluña* (2) (1985) de Manuel Rodríguez López. Alí, tras noticias que arrincan da Idade Media, avanzamos de Manuel Milà i Fontanals a Eugeni d'Ors, pasando polo «encís» ou feitizo que alma e pobo galegos provocaron en Joan Maragall. Outras aportacións monográficas permiten camiñar pasenxadamente sobre cada un dos elos dessa relación.

Rosalía de Castro na prensa barcelonesa (1863-1899) (1993) de Carme Hermida Gulías, máis alá do contido axeitado ó título, facilita facermos un documentado percorrido polo oitocentos no que a proxección do galego en Cataluña se refire. A historiadora, nun artellamento de fases cronolóxicas moi definido, sitúa o gradual decantarse catalán por unha Galicia que interesa máis polo discurso político que polo cultural, coordenada na que Rosalía –consonte con todo isto, máis a reivindicativa que a intimista– logra ser un nexo de orde literaria (1993: p. 83). Ela será sen dúbida a ponte fundamental, pero cotexada sobre o recoñecemento, quereríamos engadir, outros nomes como o de Manuel Curros Enríquez, que ve traducidos por Constantí Llombart e laudatoriamente prologados por Vicente Blasco Ibáñez en 1892 e desde Valencia os seus *Aires da miña terra*. Esa plataforma común é a que atoparemos fincada no cruzamento de séculos e á que poderá remitir Joan Maragall ó prologar *Poesía & Prosa* (1905) do lusitanista Ignasi Ribera i Rovira e afirmar verbo do espírito atlántico: «Nosaltres, aquesta ànima la coneixíem ja un xic per Rosalía de Castro i Curros Enríquez, per aquells nostres parents de la llunyana Galicia, que és sols una prolongació de Portugal» (J. Maragall, 1970: p.830).

Xesús Alonso Montero –que en *Galicia vista por los no gallegos* (1974) ofrece, entre outras perspectivas, a expresada en catalán sobre Galicia e a súa cultura por nomes que van de Víctor Balaguer a Josep Pla ou Joan Perucho – xa tratara previamente no seu artigo *Joan Maragall e Galicia* (1972) a devandita mirada sobre a esencia do galego e das letras galegas por parte do poeta e teórico do *Modernisme*. Para iso, Xesús Alonso Montero trouxo ó galego algunas liñas e versos da súa correspondencia e poesía amais dun apuntamento sobre a súa sorte nas traduccións ó galego. Co nome de Maragall ficaríamos instalados na

transición cronolóxica e estética do oitocentos ó novecentos e proxectándonos sobre o século XX. Asemade nun intre de cambio no tocante á contemplación de Galicia desde o Mediterráneo. A todo isto referímonos nós nunha parte da nosa aportación ó congreso xa citado, *A imaxe e o concepto de «galego» nas literaturas galega, castelá e catalana da Fin do Século XIX* (1997). Nestes traballos propónense as claves para segui-los pasos dessa relación no novo século. Nas primeiras décadas da centuria seguiría a ser constante a presencia do galego no ámbito catalán e viceversa. Quen asinamos este breve repaso histórico e bibliográfico andamos a traballar no momento de redactalo sobre documentación do tipo do manifesto de adhesión ó catalanismo que constitúe *Catalanismo militante* (1901) do rexionalista Aurelio Ribalta, ou de *Galicia ante la solidaridad* (1970), de Eugenio López Aydillo, libro-enquisa a diversas figuras coetáneas onde a referencia a nomes cataláns é máis que relevante, á beira de xuízos como o de Joaquín Novoa sobre a oportunidade, xa referida por Alfredo Brañas, dunha cidade hexémónica como Barcelona no embate rexionalismo/centralismo e a falla do seu equivalente no caso galego. Moita más documentación e referencias de cariz literario, neste caso desde a perspectiva catalana e indo cara ás décadas segunda, terceira e cuarta, fornecen *Castelao dende Catalunya* (1988) de Xosé Lois García e *Carles Riba e Galicia* (1993) coordinado por Xesús Alonso Montero. *La obra narrativa de Vicente Risco* (1993) de Olivia Rodríguez remite asimesmo a puntos de encontro nesta cronoloxía como o paralelo entre a Xeneración Nós e o Noucentisme catalán, ou a comunicación entre a Vangarda catalana e o seu voceiro en Galicia, Vicente Risco; ou mesmo o seguimento por parte deste autor da obra de Joan Maragall, Santiago Rusiñol e Eugeni d'Ors. Apóralle a este último o ser «o máis traidor dos intelectuais» polo seu rexacemento das letras catalanas en procura do abeiro das castelás no 1923, aínda que lle seguirá sendo fiel, reconécedo especialmente nos seus traballos de posguerra, cando o propio Risco abandonara o galego. Mediante o último título mencionado de Alonso Montero, pola estructura rebordada de círculos concéntricos sobre o tema eixo do título –a edición da incursión de Riba, alá polo 1911, na poesía galega–, mesmo avanzaríamos ata unha data histórica-cultural non tan afastada de nós.

Volvendo, finalmente, ó intre no que nos achabamos, cómpre sinalar que só a crise socio-política que culmina na Guerra Civil e o xurdimento dun réxime oposto a aqueles intereses e pontes culturais, rachou os lazos iniciados no século XIX e asegurados pouco e pouco na dialéctica establecida desde os dous referentes. As coincidencias e diverxencias sobre postulados rexionalistas expresadas por Joan Maragall (1981: pp. 347-352) en artigos de 1893 e 1897 verbo de Alfredo Brañas e Salvador Golpe, respectivamente, serían unha mostra disto último. Con posterioridade ó conflicto civil impúxose un lapsus naquel recoñecemento mutuo e, só gradualmente, unhas novas estratexias cara ó reencontro. No último volume citado de Alonso Montero áchase información ó respecto. Igualmente no traballo de Quintana Font lembrado ó comezo. *La Península inacabada* de Agustí Calvet i Pasqual «Gaziel», publicada en 1961, sería, nese contexto, unha ollada catalana que ó pousar en Galicia, incorpora desde o seu presente datos e sentimentos provintes da experiencia pre-bélica do autor:

«...sí que ve a tomb de dir que tot Galicia –esglésies, palaus, fonts, campanars, pazos, santuarios, monestirs i fins els hórreos i cruceiros– és una meravella barroca.

L'esperit ho deu ser també, perquè els seus millors estilistes idiomàtics, tant en galleg com en castellà, començant pel modern més extraordinari de tots, don Ramón del Valle Inclán, que jo he coneut d'estudiant, a Madrid, són barrocs fins al moll de l'os. Encara no agafa la ploma, com aquell qui agafa un clarinet, un escriptor d'aquesta terra, vull dir un dels granats, tant si vol expressar-se en l'idioma vernacle, a la faisó de la gran Rosalía, el graciós Curros Enríquez, el bon Otero Pedrayo o el saborós Cunqueiro, com si ho fa en el manllevat de Castella, com el meu vell amic Wenceslao Fernández Flórez o el repolit Eugenio Montes, sense el menor esforç arrenca de l'instrument, amb el buf propi i la digitació precisa, una tan recargolada i abundosa melodia, que és un prodigi de sentir-la» (1970: p. 985).

A andaina segue aberta. Quixeramos só, desde a ocasión que nos brinda *Madrygal*, ofrecer estas liñas como chamada para quen considere que refacer e afirmar estas pontes culturais ten sentido. Oxalá foran, neste o seu primeiro número, o agoirro dunha continuada serie de aportacións ó estudio comparado e sobre relacións das letras galegas

coas outras literaturas do ámbito peninsular e á inversa. Que as voces de María del Mar Bonet e Núria Espert entoando *Campanas de Bastabales*, *Corre o vento, o río pasa* e *A xusticia pola man en Rosas a Rosalía* (1997) de Amancio Prada sexan o más favorable esconxuro.

REFERENCIAS BIBLIOGRÁFICAS

- ALONSO MONTERO, Xesús (1972): *Joan Maragall en Galicia*, La Voz de Galicia, 16-V-1972, s. p.
- (1974): *Galicia vista por los gallegos*, Madrid, Ed. Júcar.
- (1993): *Carles Riba e Galicia*, Vigo, Galaxia.
- BALAGUER, Víctor (1883): *Las Literaturas Regionales*, Discurso de recepción en la R.A.E., Madrid, Imp. i Fund. de M. Tello.
- BRAÑAS, Alfredo (1889): *El regionalismo: estudio sociológico, histórico y literario*, Barcelona, Jaime Molinas.
- CALVET I PASQUAL, Agustí «Gaziel» (1970): *Obra catalana completa*, próleg de Josep Benet, recopilació, ordenació i notes de Tomàs Tebé, Barcelona, Selecta.
- CURROS ENRÍQUEZ, Manuel (1892): *Aires de mi tierra*, traducción de Constantí Llombart, prólogo de Vicente Blasco Ibáñez, Valencia, Francisco Sempere.
- FILGUEIRA VALVERDE, Xosé (1985): *Limiaria Gallegos en Catalunya* (2), de Manuel Rodríguez López, Barcelona, Centro Gallego, pp. 7-8.
- GARCÍA, Xosé Lois (1988): *Castelao dende Catalunya*, A Coruña, Ediciós do Castro.
- HERMIDA GUILAS, Carme (1993): *Rosalía de Castro na prensa barcelonesa (1863-1899)*, Ediciones do Patronato Rosalía de Castro.
- LÓPEZ AYDILLO, Eugenio (1907): *Galicia ante la solidaridad*, Madrid, Imp. Gutemberg-Castro.
- MAGARIÑOS, Alfonso (1979): *Los gallegos*, Barcelona, Epidauro.
- MARAGALL, Joan (1970): *Obres Completas. Obra Catalana*, próleg de Josep Carner, Barcelona, Selecta.
- (1981): *Obres Completas. Obra Castellana*, próleg de Pedro Laín Entralgo, Barcelona, Selecta.
- MILÀ I FONTANALS, Manuel (1893): *Catalanisme, Obras Completas*, Barcelona, Librería A. Verdaguer, vol. V, pp. 431-435.
- MURGUÍA, Manuel (1976): *Los precursores*, La Coruña, La Voz de Galicia.
- PRAIDA, Amancio (1997): *Rosas a Rosalía*, Madrid, Fonomusic, CD-8012.
- QUINTANA FONT, Artur (1997): *Presencia e influencia das letras galegas sobre as catalanas de postguerra*, V Congreso Internacional de Estudios Galegos, A.I.E.G., Trier (no prelo).

RIBALTA, Aurelio (1901): *Catalanismo militante*, Madrid, Imp. de Romero.
RIBERA LLOPIS, Juan M., RODRÍGUEZ GONZÁLEZ, Olivia (1997): *A imaxe e o concepto do «galego» nas literaturas galega, castelá e catalana da Fin do Século XIX*,

V Congreso Internacional de Estudios Galegos, A.I.E.G., Trier (no prelo).
RODRÍGUEZ GONZÁLEZ, Olivia (1992): *La obra narrativa de Vicente Risco*, Madrid, U.C.M., Tese de Doctoramento.